

五邊典則

顧廷龍署



五邊典則

卷之四

五邊典則卷之十九

信安徐日久子卿父集

勾餘施邦曜爾韜

金匱

閩漳張燮紹和父

西南

洪武初中書省臣言廣西諸洞雖平宜遷其
人內地

上曰溪洞猺獠襍處其人不知禮義順之則服
逆之則變未可輕動今惟以兵分守要害以
鎮服之俾日漸教化則自不爲非數年之後

皆爲良民何必遷也

三年土酋覃屋爲亂命平章楊璟討之

勅璟曰蠻賊恃山溪險阻乘時竊發出沒無常
若根誅其黨必深入山谷傷損士馬所得不
償所費今師擊之但使遠去不出擾州縣也
不必窮其巢穴更宜約束麾下慎無逐利輕
動

五年貴州宣慰使霽翠言部落有隴居者阻
兵拒官府請討之

上以隴居反側由于霸翠所激謂大都督府臣
曰蠻夷多詐不足信也中國之兵豈外夷報
怨之具耶宜遣使諭蠻中守將慎守邊境霸
翠所請不從將啓邊釁宜預防之

六年四川蠻酋編張叛

命指揮袁洪討之獲其男張壽編張遁匿溪洞
餘黨散入雲南

上遣使諭洪曰南中蠻夷乍降乍叛乃其常事
不足深罪今獲其俘悉編爲軍如再不服然

後誅之其所叛境必以兵威震之否則終無
懼心逃竄者駐兵索之毋遺民患

十六年三月

勅四川布政司自今非奉

朝旨不得擅移文蠻夷以生邊事

十七年八月平緬宣慰司思倫發遣力令孟
入獻方物并上故元所授司印平緬在西南
夷稍遠自雲南大理越金齒至其地所謂百
夷是也元時常屬緬甸有城所屋室人皆樓

居地產象馬官民皆禿髮如僧出入乘象前
代未嘗通中國元始入貢洪武十五年大兵
旣下雲南取大理金齒壤地與平緬相接思
倫發懼故遣使朝貢

上嘉之尋以麓川與緬連境遂改爲麓川平緬
宣慰使司仍以思倫發爲使兼統其地按元
時本分置兩路今并爲一雖長于撫御却使
緬夷氣勢漸張所以後來費手次年一二月
思倫發反邦師征之失利

十八年柳州府馬平縣主簿孔性善言溪洞
徭獞恃險竊發殺掠良民及官軍討捕則退
入溪谷操强弓注毒矢潛守隘口卒不能獲
兇頑自恣爲患益深乞于賊人出沒之地立
寨置兵扼其襟喉斷其出路譬穴中之鼠技
窮食盡可以盡勦然此雖盜賊豈無良心昔
陳景文爲知縣時徭獞皆應差役厥後長吏
撫字乖方始復反側誠使守令得人示以恩
信諭以禍福彼雖兇頑豈不革心向化爲良

民乎

上嘉納其言命吏部凡臨溪洞郡縣擇賢守令以撫輯之

十九年湖廣都指揮奏請運施州崇山大庸五開黃平平越等衛軍食

上覽奏謂戶部曰崇山大庸屯種歲久何得乏食數年來軍中無尺寸之功但知需食有司而不惜吾民供給之困惟施州從其請五開等衛令軍士屯田自食

二十年廣西潯州府知府沈信言府境接連
柳象梧藤等州山溪險峻徭賊出沒不常近
者廣西叅議湯敬恭爲大享老鼠羅碌山生
徭所殺官軍討之賊乃登陟巖崖扳緣樹木
捷如猿狖追襲所不及若久駐兵則瘴癘時
發兵多疾疫又難進取及至兵退復出爲患
臣以爲桂平平南二縣舊討徭民皆便習弓
弩慣歷險阻若選其少壯千餘人免其差徭
給以軍器衣裝俾各團村寨置烽火與巡檢

司民兵相爲聲援協同捕逐可以殲之

上曰蠻夷梗化彼習然也使守土官能招徠之
何用殺戮若無事但當謹其防禦使不爲患
耳苟爲寇不已民有不堪則發兵討之何必
圍寨

八月以將征百夷遣右軍都督僉事孫茂以
鈔三萬二千錠往四川市耕牛萬頭先往雲
南屯田已又命曹震又命耿炳文又命陳恒
葉陞等陸續往屯命布政司給銀糴糧命石

五邊典則 卷九
聖祖諭沐英等設堡置驛

聖祖舉事其初預慮周悉如此

二十一年三月沐英討百夷思倫發大破平
之

四月遣使諭西平侯沐英曰近得報知已破
百夷思倫發遁去可移軍漸逼景東然夷性
頑犷苟未引咎乞降必再入寇定邊去滇池
遲行則用旬月速行又難與戰欲圖萬全須
隨地屯岡堅壁固壘與之相持以俟大軍四

集然後進伐前此之勝故指揮吳良堅守小寨亦幾受侮汝慎勿輕之務在持重相幾決勝覆其巢穴乃爲善爾

五月先是

上遣舍人潘旺諭英曰近命普定侯陳桓領步騎二十餘萬爲爾聲援如欲增兵當遣後繼桓未及至英恐後時失機乃令其子春先往赤水河觀軍實而遣人來奏曰百夷負固恃險亦由雲南內地之人互相煽誘今欲大舉

殲滅之若于數十萬兵中精選十萬往取景
東及遠幹威遠等地賊聞必率衆來援因逆
擊之勢必克但巢穴未傾須用再舉今東川
越州羅雄把哲諸夷悍驚未服必須併力勦
捕一以資給糧餉一以驚懾餘衆使賊聞之
姦計自沮仍于寬衍之地爲來歲屯田之計
內地旣定續議大舉可也東川一部稍爲強
盛今罪狀已露尚恃姦勇必用進兵庶可宣
揚威德

上然之

七月遣使齎

勅諭征南將軍頴國公李元德等曰東川芒部
諸夷種類雖異而其始皆出于囉囉厥後子
姓蕃衍各立疆場乃異其名曰東川烏撒烏
蒙芒部祿摩水西無事則互起爭端有事則
相爲救援若唐時閭羅鳳公居大理唐兵追
捕道經芒部諸境羣蠻外稱歸順內實狙詐
聚集凶醜據險設伏唐將不備遂墮其計以

致喪師者因將帥過信無謀故也近稱東川
諸蠻不叛者號爲循良固未可逆詐然須豫
加防閑嚴整師旅使彼不得肆其姦謀然後
賊可破也又曰今令諸夷執送東川蠻人恐
此令旣出蠻人詭謀亦由此生將假此輩爲
名偵伺我軍當愈加嚴慎不可托以腹心蓋
蠻夷平日夫婦無倫亂如羣犬雖父子不相
保其言豈可信哉今欲降伏之其地山勢險
峻道路崎嶇林箐深邃其人與猿猱無異大

軍一至竄入林藪猝難捕獲宜且駐兵屯糧待以歲月然後可圖也

二十一年二月西平侯沐英遣都督甯正從傅友德擊阿資於越州敗之阿資勢窮蹙與其母請降初阿資之遁也揚言曰

國家有萬軍之勇而我地有萬山之險豈能盡滅我輩英乃請置越州馬隆二衛扼其衝要又分兵追捕至是勢窮遂降

二十二年十二月